

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA FEPUARI 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

FEAGAIGA OSI, SATALO



Meafou Ah Ching FS & Sapiai Auelua

FEAGAIGA OSI, SAANAPU-TAI



Leuelu Setu FS & Panorama

OSIGA FEAGAIGA EFKS LEVILI



Peniamina FS & Eseta Leueli (ogatotonu) ma Alesana FS & Siapolima Afamasaga (tupito)

O LE FAASINO UPU

1. O le Lauga	2
2. Osiga Feagaiga EFKS Satalo	3
3. Osiga Feagaiga EFKS Saanapu-tai	4
4. Osiga Feagaiga EFKS Levili	4
5. Faitauga i le Tusi a Ruta	5
6. Molimau o Lale Ieremia FT	6
7. O le Perofeta Mulimuli	8
8. O lau Afioa o le Sulu i o'u vae	14
9. O e ua fai i Lagi le Folauga:	15
(i) Tagisia Alao Solofuti Momo'e Gagaeolo	
(ii) Sauao Potoa'e Ropati	
10. Ata o Mataupu Lomia	16

O LE LAUGA

Tusi Faitau: Ieremia 5:20-25

Matua: Ieremia 5:22

“Tou te le fefefe ea ia te au? o loo fetalai mai ai le Alii.” Tou te le gatete ea i o'u luma? O a'u na ou tuuina le oneone e fai ma tuaoi o le sami; o le tulafono e faavavau lea, e le masopoia; e ui ina fati tele mai ona galu, e le mafaia lava; e ui ina taalili mai e le masopoia lava.”

Manatu Autu [Tusi Faitauaso]:

AUA NEI GALO [DO NOT FORGET]

Talofa Fepuari 2026!

Ioe, o le Natura alofa o lo tatou Atua, lea lava ua tatou maua ai lana puipuiga malu, ma ana faamanuiaga e tele, ua tatou aulia manuia mai ai lenei masina lona lua o lenei tausaga 2026.

Fai mai se vaega o le Matua ua faitauina mo lenei lauga;

“O a'u na ou tuuina le oneone e fai ma tuaoi o le sami, o le tulafono e faavavau lea, e le masopoia;...”

O le fetalaiaga lea a le Atua ia Ieremia le perofeta, sei tau toe faamanatu atu ia Iuta le nuu, le natura o mea na faia ai e le Atua, o le faatusa lena o le natura alofa o le Atua e na te puipui ma laveai ia Sa Iuta aemaise o lona natura alofa e ala i faamanuiaga na te foai atu pea mo lona laueleele.

O le faatusa a le Atua i le uiga o le sami ma le vai, e na te lē sopoia le eleele matutu, o loo ola saogalemu ai le tagata. O le uiga faa natura lea o mea na faia ai, e lē sopo le tai i le eleele- Aisea?

O le Atua o loo faatusaina i le oneone o le matafaga o loo fai ma pa puipui mo Sa Iuta, ia 'aia lava nei osofaia e le fili ma le tiapolo, a e ia ona maua le ola saogalemu, ma ia tumau pea ana faamanuiaga mo le tagata.

Pagā, ua lē faapena le olaga ua oo i ai le nuu o le Atua, auā ua galo ia Sa Iuta, le natura alofa lea o le Atua, o le ala lea ua feagai ai loa ma puapuaga ma faafitauli, aemaise le tafeaga i Papelonía.

Ua sopo le tai i le eleele. Ua galo i le Isaraelu lona faasinomaga ma le mea e gata ai. Ua fia pule i mea e pule ai le Atua. Ua sopo tuaoi ma ua fia avea ma atua le tagata. O lona uiga, ua matuā galo nimo lava ia Sa Iuta, le natura alofa o le Atua mo latou.

O le feau mo lenei masina o Fepuari; AUA NEI GALO LE NATURA ALOFA O LE ATUA. E pei lava o upu a le fai Salamo 103:2; *“Lo'u agaga e, ia e faamanu atu i le Alii, aua foi nei galo se mea e tasi o ana mea alofa...”*

Le paia e o le Ekalesia, o lea ua ofi atu i le ava lo tatou sa folau o lenei tausaga 2026. Ua tatou faasagasaga atu nei i le folauga e feagai ma le vasa lea.

Ia aua lava nei galo ia te oe ma a'u le natura alofa lea o le Atua. O ana mea alofa faa natura lea o aso uma lava, e ala i Lana puipuiga malu, o lou soifua ma so'u ola. E ala i ana mea alofa foaifuaia mai o aso taitasi, lea o loo tatou molimauina i lo tatou siosiomaga faale natura.

O a lava faafitauli ma faigata e oo mai a o tatou folau i lenei masina, ia manatua, o tatou lava o tagata faatuatua, aua nei galo ia te oe ma a'u, le siosiomaga ma le natura o mea na faia ai e le Atua, o loo faaalía manino mai ai lana tausiga ma lana puipuiga mo oe ma a'u i aso uma lava.

E pei lava ona tatou vaavaai atu i mea na faia ai, e le sopo le tai i le eleele. Ae a oo loa ina sopo le sami i le eleele, o lona uiga la, o le a faaleagaina ma o le a malepe mea na faia.

Ma o lona uiga foi lea faaleagaga, pe a oo ina galo ia i tatou le Alofa o le Atua, ua tatou fulitua ma ua galo ia i tatou le natura alofa o lo tatou Atua na faia ai mea uma lava. O le a oo ina malepe la tatou mafutaga

ma le Atua alofa. O le a feagai tatou ma faafitauli o le olaga.

Ia 'aia nei galo ia i tatou uma lava, le tele ma le anoanoai o meaalofoa a le Atua, o loo fa'aalia mai pea i lou siosiomaga faale aiga, o aso uma lava. O lou aiga ma lau fanau, o meaalofoa muamua ia a le Atua, ia 'aia nei galo ia te oe ma a'u, o loo aumaia ai lona alofa ma lona mafanafana i aso uma lava, e ala i le mafutaga a Matua ma fanau.

E ala ona tutupu faaletonu i a tatou fanau, ona ua galo i fanau aemaise Matua, e i ai lava le tuaoi o mea uma na faia ai e le Atua. Ia 'aia nei sopo le sami i le eleele. A oo ina iloa e fanau ava ma fa'aaloalo i o latou Matua, o iina e amata ai ona tatou iloa le alofa faa natura lea o le Atua i aso uma lava.

Le paia e o le Ekalesia, aemaise uo ma paaga a le Sulu Samoa; AUA NEI GALO LE ATUA MA LONA NATURAALOFA...

Ioe, aia nei galo lona Alofa Tunoa e ala ia Iesu Keriso, sa fa'aalia lea i luga o lona Satauro, aemaise o lona Toetu manumalo mai le tuugamau.

O le atoaga lena o le Natura Alofa o le Atua, ina ia mafai ai ona faaolaina tatou mai le pa'u atu i le loloto o le agasala.

Le Ekalesia e, e galo loa le Atua ma lona Alofa ia i tatou, ona amata foi lea ona oo mai mala ma puapuaga i o tatou olaga.

Amene.

Saunia susuga Tonu Mauafu FS,
Failautusi Matagaluega Faasaleleaga,
Faafaegaiga EFKS Iva,
Pulega Safotulafai, FAASALELEAGA.

O NISI O AULOTU MA LATOU FAIFEAU & FALETUA UAI AI:

1. EFKS Matautu-tai Lefaga - Ioane Samuelu FS & Lufi.
2. EFKS Levi Saleimoa - Iakopo Faasalaina FS & Mary.

OSIGA FEAGAIGA EFKS SATALO

O le Aso Lulu, 11 Fepuari na faataunuuina ai le sauniga o le Osiga Feagaiga a le EFKS Satalo, Pulega Falealili, ma lo latou faifeau, susuga Meafou Ah Ching FS ma le faletua ia Sapiai Auelua Tupalu. O le toeaina lava o le Pulega, le Komiti Faatonu o le Matagaluega Falealili Safata & Siumu, susuga Tunumoso Soliola Iosia FT na ta'ita'ia le sauniga mamalu. O le aufaigaluega na lagolago i le sauniga: Faitau Tusi Paia - Letone Uili FS (EFKS Poutasi) Tatalo - Reupena Leau FS (EFKS Piu)

Lauga - Amosa Vaetoe FS (Matautu Falealili) O le Failautusi foi lea o le Pulega Falealili, na ia tolaulau tiute fai e tatau ai a le Faifeau ma lona Faletua, faapea foi le Aulotu - o se faiga e fitoitonu i osiga feagaiga na o lea Pulega.

O le afioga i le tiakono ia Taveuveu Willie Tuatagaloa na molimau fai ma sui o le Aulotu i la latou faiga filifiliga. O le faaiuga o Setema 2025 na fai ai le latou palota i faifeau e to'afa, lea na manumalo ai Meafou. Na fesiligia le aiga na faatuina le faifeau po ua feiloai pe vaai i ai, ae tali mai e leai. O se faailoga o le tofiga ua faia e le Atua, ae le o fesootaiga faaletagata. Na ia talosagaina foi lo latou galulue ma faasoa faatasi e manuia ai le galuega.

Na faapea foi ona tali fuaitau le susuga Meafou i le la'ua talia o le valaau. Na i'u mai le Kolisi Faafaifeau Malua i le 2020, ona galue lea faafaiaoga i le Kolisi Maluaafou mai le 2021 seia oo ina valaau atu le Ekalesia i Satalo. O le aso 3 Oketopa 2025 na latou feiloai ai, ma na la'ua talia ma le fiasia ma le loto faafetai, ina ua oo ane le faatofalaiga a le paia o le Ekalesia ia i la'ua. Na fai tuutuuga mo le aso e faataunuu ai lo latou faamoemoe, e pei ona i ai lenei aso.

O le susuga Meafou ma le faletua sa galulue i le EFKS Peteleema fou i Faleata, lagolago i le Toeaina susuga Iosefa Afutiti FT ma le Ekalesia. O Meafou e mai afioaga o Vaitele fou, Saaga Siumu & Fagae'e. A o le faletua o se taulaga soifua a Lepa, Aufaga ma Saleapaga. Na folasia le IE o le Feagaiga na saunia e le Ekalesia Satalo, ma faai'u ai le sauniga i le Sakarameta o le Faamanatuga na ta'ita'iina e le susuga i le faafaegaiga le auga o aute o lea aso. Ona tauluga ai lea o le aso fiasia i le taumafataga ma fa'aaloaloga faaleaganuu masani, sa tapena e le Ekalesia faapea le lagolagosua a aiganalua. Ia manuia le galuega, ma i ai le Atua le viiga e faavavau. **(FT)**

OSIGA FEAGAIGA EFKS
SAANAPU-TAI, PULEGA SAFATA

O se tasi o osiga feagaiga na faataunuuina i lenei masina, o le feagaiga i le va o le EFKS Saanapu-tai, ma lo latou tofi le susuga Leuelu Setu FS ma le faletua ia Panorama, sa faia i le Aso Faraile 13 Fepuari. O le susuga Leuelu na i'u mai Malua i le tausaga 2018, e lua tausaga na a'oa'aoina ai le Kolisi Faafaifeau a le Pasefika i Fiti, ona galue ai lea o se Faia'oga o le Kolisi Faafaifeau i Malua. Na faauuina e avea ma Faifeau Samoa i le 2023. O ona afiogaa o Luatuanuu ma Satupaitea, a o le faletua ia Panorama o le lupe faalele a aiga ma le afioaga o Utualii.

Na ta'ita'i le sauniga e le Toeaina o le Pulega Safata & Siumu, susuga Kereta Fuafiva FT. O le Tusi Paia na faitauina e le susuga Tanuri Pesaeli FS (Tafitoala), o Tatalo na saunia e le susuga Denny Epati FS (Sataoa uta) a o le Lauga na saunia e le susuga Feata Perelini FS (Lotofaga). O le failautusi o le Pulega, susuga Tuia Peseta FS na ia tolaulauina tiute faasinotonu i le Faifeau faapea le Aulotu, o Taiala Faaleagaga a le Pulega ua 92 tausaga; ona sainia ai lea o le Pepa Faamaonia o le feagaiga ua osia - o se faiga e faapitoa lava i lea Pulega, ae le o se faasinoga a le Tusi Failotu, Ia Viia Lou Suafa.

O le afioga ia Leaana Posini na fai ma sui o le Aulotu e molimau i la latou faiga filifiliga, na ia ta'ua ai o le Faavae o le latou nuu, talu mai le tausaga na faatuina ai le Lotu, o le faifeau lava e finagalo i ai tamalii o le afioaga, o lena lava o le a tofia. Peitai o lea ua fai le suiga, na faatu mai ai faifeau e 14 na fautuaina e Matafale, ma fai ai le palota. O le uluai faia'oga Malua lenei ua latou filifilia. Na ia faafetaia foi le Toeaina Penisione sa tausia le galuega, susuga Roma Enosa FT ma le faletua. O Leuelu ma le faletua, ua sui tulaga atu i Saanapu-tai, ina ua penisione le susuga Iakina Alefaio FS ma le faletua ia Roina i le 2024. Na saunoa foi le susuga Leuelu e tusa o lo la'ua taliaina o le valaau, na maua luga le agaga faafetai i le Atua mo lana tofiga, e ala i le Ekalesia i la latou faatofalaaiga ua afe ane ai ia te i la'ua mo le tausiga o le galuega. O i latou na valaauina e faatalofa ma faamanuia aloaia i le faifeau ma le faletua, e aofia ai Fili Si'a FT, Apineru Tanielu FT, Tunumoso Iosia FT, Taveuveu (Tiakono Toeaina), Letone Uili FS. Na silamalo foi le faapotopotoga i le IE o le Feagaiga na saunia e le Ekalesia. Ona faai'u lea o le sauniga i le Talisuga Paia a le Alii, na ta'ita'iina e le faafeagaiga taulagi filifilia. Ia manuia le galuega. **(F. Tolua)**

OSIGA FEAGAIGA EFKS
LEVILI, VAIMAUGA

O le sauniga o le osiga feagaiga a le EFKS Levili, Pulega Vaimauga Sisifo o le Matagaluega Vaimauga, na faataunuuina i le Aso Faraile 27 Fepuari 2026. O lo latou faafeagaiga le susuga Peniamina ma le faletua ia Eseta, o le Faifeau Nofo Aiga o le EFKS Leulumoega Tuai, sa galue i le Ofisa Tutotonu o le Ekalesia. O lea sauniga sa ta'ita'iina e le afioga i le Taitaifono o le Fono Tele, le Toeaina o le Pulega Vaimauga Sisifo, a o le Faafeagaiga Taulagi o le EFKS Tanoalei'a, Vaivase uta, le susuga Enefatu Lesa FT. O le Tusi Paia na faitauina e le susuga Siaosi Salesulu FS (Vailele), o talosaga na saunia e le susuga Ionatana Te'o FS (Maugafiafia), o le lauga mo le faifeau ma le faletua na saunia e le susuga Seilala Lumanuvae FS (Vaivasetai), a o le lauga mo le aulotu na saunia e le susuga Petaia Leavai FS (Fagalii).

Na molimau le sui o le Ekalesia i la latou faiga filifiliga sa fai e ala i le palota, sa autasi ma fulisia ai i le susuga Peni ma le faletua. Na saunoa foi le susuga Peni e tusa ma lo la'ua talia lelei ma le faafetai, o le tofiga a le Atua mo i la'ua e ala i le faatofalaaiga a le Aulotu i Levili. Ona faagasolo ai lea o le osiga o le feagaiga i luma o le Atua ma luma o le faapotopotoga. Na folasia foi le IE o le Feagaiga na molimau i ai le Taitai ma le au mau tofi o le sauniga, tainane aigalua ma le faapotopotoga na auai. Ona valaauina lea o susuga i Toeaina sa auai e faatalofa faafeiloai aloaia ma faamanuia i le faafeagaiga tofia ma le faletua.

O se itu e tulaga ese ai lenei osiga feagaiga, o le vaega o le aso na faatino ai, ina ua faataunuu i le vaveao i le itula e 5.00 i le taeao. O se uluai osiga feagaiga lenei ua faia i lea taimi, e ui ina e leai se taimi faapitoa o faailoa mai e le Ia Viia Lou Suafa, le Iloiloga o Iugafono Tumau po o le Faavae o le Ekalesia. A o se fuafuaga na talia e le susuga i le Toeaina, ona o se talosaga a le Aulotu, e fai ma fesoasoani faamama avega i lo latou to'a gaogao. Peitai, talu ai nei foi sa faia ai se isi osiga feagaiga i le itula e 7.00 i le taeao. Mata o nisi nei o suiga e ao ona mataitu, i ona itu lelei e faamalosi ai, ma ni ona vaivaiga e talafeagai ai ona toe iloilo atili.

Na tauluga le tapuaiga i upu faala'ei'au a le Toeaina, ina ia latou ati a'e faatasi le galuega, mo le viiga o le Atua. Ona faai'u lea o le aso i tu ma aga faaleaganuu masani, o le usu fa'aaloalo, o taumafataga ma fa'aaloaloga. Ia manuia tele le amataga o le isi lautusi fou o le galuega. **(FT)**

FAITAUGA I LE TUSI A RUTA

O le faamaoni ma le lotomau o Ruta **(Ruth's loyalty and commitment)**

O le tala ia Ruta, o se tasi o tala lauiloa i le Tusi Paia, ua tatou masani ai, auā ua laugaina soo, e faatino i Lotu a Tamaiti, o Mafutaga Autalavou, aemaise o Aso Sa o Tina. O se tala ua fatu ai pese aualofa, ma e masani ona faavae ai apoapoaiga mo aiga e faapaia i faaipoipoga; tainane o maliu ma nisi o faamoemoega taua. Ae ui ina faitau soo, e lē faaitiitia pe uma ai lona matagofie, auā e lē o se tala fatu, poo se talatu'u faalutaia, poo se tala faafagogo; a o le tala moni lava. E lē uma foi lona manaia ma aulelei faaleagaga, ona o le tala e autu i le alofa, le alofa e moni ma faamaoni, o le alofa e tutumau, le alofa o le tamaitai Moapi, le fafine ua oti lana tane, le teine talavou o Ruta; o le ituaiga alofa e atagia ai le alofa faamaoni ma tutumau o lo tatou Atua.

Ua tatou faitau ma faalogo soo i le amataga o lenei tala, i le aiga Peteleema na sulufa'i i Moapi, ina ua velavela le oge i laufanua o Isaraelu. O Elimeleka ma Naomi, ma la la'ua fanau tama o Maalona ma Kilion. Na maliu le tamā o le aiga, ona fai avā lea o ona atalii i teine Moapi, o Maalona ia Ruta, a o Kilion ia Orepa. E sefulu tausaga na latou mafuta ai, ae le'i maua se suli o le aiga; ona maliliu lea o nai tama, ae totoe ai na o le tina ia Naomi, ma fafine ua oti a la'ua tane ia Ruta ma Orepa.

Mulimuli ane, ona sauni lea o Naomi e toe foi i Peteleema i Iuta, o ia faatasi ma Ruta ma Orepa. Ua latou oo atu i le fetaula'iga ala e ui ai i Iuta, ona latou faamavae lea. Ua fai atu Naomi i avā a lana fanau, ina ia foi atu i la'ua i lo latou nuu o Moapi, a o ia o le a foi toatasi i Peteleema. Ma e pei ona sa tatou faitau ai, o se taimi faigata tele lea mo nai fafine e toatolu, i le loimata maligi, o le faanoanoa ma le loto nutimomoia, ina o le a tete'a ma faamavae.

A o le taimi foi lenei, na faailoa manino ai, ma susulu malamalama mai le alofa moni o le tamaitai o Ruta, o loo autu i ai lenei tala. Lona faamaoni, ma lona tutumau. O le alofa faamaoni ma tutumau, e sili atu nai lo Orepa. Auā na i'u ina toe foi Orepa, atonu o lona usitai ia Naomi, pe ona ua uma foi lona sao ma lana tausiga, ua le toe saisaitia pe noatia o ia faaletulafono. Peitai o Ruta, sa le'i mafai Naomi ona tauanau e alu ese. Na fiu Naomi e finau, e faatonu, e fautua, e talosaga, ina ia tuu atu o ia e alu toatasi; ae sa le'i mafai Ruta ona alu ese, e tuua toatasi na o

Naomi e alu. Faafofoga foi i lana ta'utinoga ta'uta'ua, *“Aua e te finau ia te au ina ia ou tuulafoai ia te oe, ia lē mulimuli atu ia te oe; auā o le mea e te alu i ai, ou te alu ai foi; o le mea e te nofo ai, ou te nofo ai, e fai lou nuu mo'u nuu; e fai lou Atua mo'u Atua; o le mea e te oti ai, ou te oti ai, e tanu ai foi a'u.”*

O le ta'utinoga o le alofa e taumulimuli, e mafuta, e faatasi pea, seia oo ina tatala e le oti. I lenei tautinoga o le alofa o Ruta, ua ia soloia ai i lalo faavae papa o le soifuaga faaletagata – e i ai tapu ma aulape o soo se tagatanuu, i lona faasinomaga, i ona fanua ma tapuafanua, o ana measina e faapelepele ma faamemelo i ai - faale aiga, o lona nuu, ma lana tapuaiga i lona atua i Moapi. Peitai, ua sosofa uma e Ruta ne'i sootaga, ona o lona alofa moni, o lona faamaoni, ma lona tutumau, i lona vaai alofa i le tina o lana tane, le tina matua ia Naomi; o lona alofa lava lea i le tagata ese, le Peteleema mai Iuta. Lea ua oo lava i lona faatuatuaga, lana tapuaiga ma le olaga faalelotu sa i ai, ua ta'utino lona lafoa'i, ae o le a mulimuli i le Atua moni e toatasi, le Atua o Naomi, le Atua o Isaraelu.

Sa le'i i ai lava sina toe mafaufau faalua o Ruta, i le auala o le a ia savalia, poo fea le itu, a o a faafitauli i le mamao, ma le lavelave o suiga tetele o le a feagai ai; sa le'i manatu mamafa foi i lona talavou ma sona lumana'i manuia, pe tua i fea lana filifiliga ua fai nei. E leai. Ae tasi lava le autu na taula'i i ai lona loto, ma faavae ai lana filifiliga ua fai, o lona alofa faamaoni, ia manuia le tina matua ia Naomi, na te tautoalua ia taunuu saogalemu, i le timu ma le la, i le a'e o mauga ma le ifo o vanu, o manu feai ma tagata faomea i le ala, ua nofo sauni e leoleo ma puipui, tainane e lamatia lona ola ma oti ai, a o lana tautoga alofa, e lē toe suia, e le toe foi ese ai.

E foliga tutusa lea, ma le filifiliga faalefaatuatua a Aperamo, na o le ioe lava ma usitai i le Atua e alu, tainane ina lē iloa poo fea e alu i ai, e faitalia le Atua ma faasino mai. E faapena le filifiliga ua fai e Ruta-e alu ona o le usitai i le musumusuga a lona fatu, e puna mai ai lagona o le alofa; e faasino mai foi e le alofa le ala e ui ai, ma lona taunuuga.

Fai mai le mau a le Tusi Paia, *‘ua sogi Orepa ia Naomi, a ua pipi'i atu Ruta ia te ia.’* O le sogi o Orepa, o le faailoga o le faamavae; a o le pipii atu o Ruta, ua faailoa ai le ofo atu atoa o lona ola, ia ola ai le isi tagata. (*fa'aauau itulau 12*)

MOLIMAU O LE SUSUGA LALE IEREMIA FT

(Saunia susuga Fuifui Teevale FS, Sui Pule Kolisi LFC 1977 - 1981)

Ou te fiafia e fai se tala e faafetaia ai le susuga i le faiaoga ma le pule aoga ia Lale Ieremia, e fai ai ma sui o Tama ma Teine tuai o le Kolisi Leulumoega Fou aemaise foi le aufaigaluega a le Ekalesia i le laumua i Roma Fou mai le 1972 -1985, sa matou mafuta ma galulue faatasi ai ma le uso a auauna, vaeane le susuga i le faife’au toeaina malolo Rev Lale Ieremia FT. O Lale o ia o se faiaoga o le kolisi LFC mai 1972 ma na avea foi ma pule o le Kolisi LFC 1980-1983. O le 1972 o le taimi muamua lea na ou mafuta ai i le uso ia Lale ina ua valaauina a’u ou te faiaoga i le Kolisi o Leulumoega fou a o avea le susuga ia Lale ma faiaoga e vaaia le nofotumau a le Kolisi. O se faiaoga e naunau tele ina ia popoto ma manuia olaga o tama ma teine o le kolisi. E le gata i lea a o se uso a auauna foi e faamalosi’au ma faamaopoopo i le mafutaga a faiaoga ma i matou uma sa faigaluega ai i LFC i lea vaitaimi, o se uso a auauna e faafiafia i tagata faigaluega a le ekalesia pei o faiaoga ina ia maua le galulue faatasi ma le faamaoni i fe’au ma tiute ua valaauina ai e le Ekalesia. Na te faamaite mafutaga, o tafaoga, o malaga ma soo se faamoemoe lelei lava e atina’e ai le kolisi a le ekalesia i Roma fou.

I le 1974 pe a na alu ai le malaga a Leulumoega fou i Tutuila e saili seleni ai mo le fausiaina o le fale Samoa o le kolisi, ma o le susuga lava ia Lale sa taulamua i le tapenaina o lea malaga. Ma o se malaga foi o loo molimauina pea e le atunuu ma le ekalesia, aua e le gata ina maua ai seleni sa fausia ai le fale Samoa manaia o le kolisi i lea taimi, ae o se malaga foi na a’oa’oina ai tama ma teine i mea tau faafiafiaga i pese ma siva ma tala faaSamoa aemaise le taleni faafiafia i faleaitu ma mea mālīe, lea sa faafiafia ai Ioelu ma Sumeo o tamaiti lava o le Pulou’apa, mulimuli ane avea ai i la’ua ma faifaleaitu ta’uta’ua o le atunuu.

O se tasi foi o galuega atia’e a le kolisi i Leulumoega fou i lea vaitaimi, o lana aoga faatusiata, (School of Fine Art), e pei ona silafia, ma o le susuga lava ia Lale Ieremia o ia lava lea sa tama autū ma taulamua i lenei atina’e. O le mea na tupu sa i ai le faiaoga tusiata mai Italia (Italy) o Enersto Coter, na aumai e le EFKS o se faiaoga o le mataupu fine art i LFC, e mafuta tele i ai Lale ia Coter, ma ua fai Coter ia Lale o le ituaiga tomai faatusi ata e talafeagai ma tamaiti Samoa, o le vaneina lea o ogalaau ma galuega faatino tuufaatasi (sculpture eg carving and mosaic), peita’i e taugata ma e leai ni la’au ma mea e faatino ai (resources), ma e le lava foi le tupe fa’aagaga (budget) a le Art department e faatino ai. O le ala lea na naunau ma finauina ai e Lale ina ia tutoatasi le aoga tusiata, ina ia feololo ai se tupe fa’aagaga (budget) e faatino ai le vaega lea o le ‘Carving’.

Ma na faapena loa ona totoina ai e Lale ma le aoga tusiata le la’au i gauta o Leulumoega Fou aga’i i le atina’e ona o lea faamoemoe. Ma o i lea ua fanau mai ai lenei tomai taua lava i tama fanau a le Ekalesia ma le atunuu i o latou tomai ma taleni faatusiata. Ma o le ala foi lea na naunau ai lenei Tama faife’au faiaoga o le ekalesia ina ia faatuina lava se nofoaga faapitoa mo le aoga tusiata i LFC (LFC Art Center), e faalauiloa ai a latou galuega faatusiata, peitai lea ua ta’ua nei o le Fale Mataaga (Museum) o le EFKS, ma o se atina’e sa taulamua ai lava le susuga ia Lale Ieremia i lona fautuaina lea o le Fonotele a le Ekalesia, e ala atu i le Komiti o Aoga, le Komiti o Fe’au Eseese ma le Komiti o Tupe, e pei ona ua i ai nei lea galuega tele ma le mataina a le Ekalesia i totonu i lona laumua i Malua ma Leulumoega Fou. Ma o le naunautaga lea o le susuga i le faiaoga, susuga i le alii pule, le faife’au toeaina, le Tama malolo penisione ia Lale Ieremia ina ia faalautele pea le atina’eina o le tomai ma le taleni faatusiata i tama fanau a le ekalesia EFKS ma le atunuu. I le mafuta ai ma le susuga i le faiaoga/puleaoga, ia Lale Ieremia i lea vaitaimi (1972-1985), sa matou maitauina ai ona uiga tausaaafia, ma le finau malosi i mea lelei mo le atina’eina o le kolisi LFC, e ala i tama ma teine a’oga.

O ana auala e a’oa’o ai fanau a’oga (filosofia poo saikolosi faafaiaoga) e faapea, **IAA’OA’OINA OE I MEAFAIGATA I LOU MAFAUFAU, INA IA E ILOA AI, E LEAI SE MEA E FAIGATA I LE OLAGA.** Ma o le faatinoga e Lale o lea filosofia faasaikolosi faafaiaoga, e le gata e tautalagia i totonu o potu aoga, a o lona faatinoga atoa e faatino lea e ala i Taaloga ma Galuega fai a le kolisi LFC, ma e taulamua lava IA i le faatinoga (He leads by example). O le ulua’i taimi i tala faasolopito o LFC na maua ai e le kolisi se siamupini o taaloga lakapi a aoga i Apia, o le taimi lea a o avea ai Lale ma Pule aoga, E oi ma fa’atu tama o le ‘au lakapi o le 1st 15s, pe a vaai atu o Lale la e faia le a’oga o le ‘au (training) e ui o loo

i ai a faiaoga (coach) o le 'au. Aua e faata'ita'i lava e ia le tuleiga o le sikalamu, e se'ilogala lava ua to'ulu uma i lalo tama o le laina i luma (forwards) ma oi ona faato'a tuu lea, e te'i lava le 1st 5 (#10) o la e tutu ua faapea atu i ai Lale, kami mai, kami mai, e pu'e lava e Lale ina ua uu ma taatiatia fai mai loa e faapena le pu'e, He leads by example. Ia a e oo loa ina ua manumalo mai le 'au lakapi, e usu mai lava i Apia le pese 'Tama o le lupe... alii e tuvalavala ua sau le fili o le taulaga' e galo uma i tama taaalo le tigaina ma le faigata o le koleniga, ae talanoa i le fiafia ina ua manumalo. **A'oa'oina oe i mea faigata i lou mafaufau e te iloa ai e leai se mea faigata i lenei olaga.**

Na sau le leoleo fanua o le kolisi lipoti mai ia Lale ao pule i le nofotumau, ua i ai le ma'umaga osofaalava ane e pupuni le ma'umaga o le nofotumau lea e aga'i atu i le atina'e a le ekalesia. Poloa'i loa Lale i nai faife'au tausinu o Falealii, e alolofa mai i ni tiapula mo le nofotumau, oo loa i le Aso Faraile matou o loa i le loli ma tama nofotumau e to'a 4, e aumai tiapula, taunuu mai i LFC ua momoe le nofotumau, ua te'a le 10pm i le po, fai mai loa Lale i le tama nofotumau sa matou o, ta faatopetope le logo, o lona uiga e tamomo'e uma mai tama i le fale Tineiafi o se faalavelave. Na ona faalogo mai lava o le nofotumau o ta'u atu le igoa o Lale la e tu i luma o le Tineiafi, e leai ma se isi na toe moe, ae tamomo'e uma mai i le logo. Fai loa ma le faatonuga a Lale i tama a ua agai atu i le 11pm, ua outou va'ai atu i le loli tiapula lea, o le alofa lena o faafeagaiga o Falealii ma aulotu mo tatou, ma e mana'omia, ia 'aua nei i ai se tiapula e ma'imau, ma e fia totō uma lava nei a e le'i malamalama, onosa'i le fiamoe, e taito'a fa i le moli penisini, u'u e le toatasi le moli, ae lalafo le toatolu ma fesuia'i, va'ai se isi ne'i lavea. E 10 moli penisini na matou faatau maia i Apia i le Aso Faraile lava lena, e alu lava le lalafo latou ae mulimuli atu ai i tua ma le matou au toto tiapula. O Lale ma lana vaega o latou sa faia le umu talo ma lu'au ma fai'ai eleni. E ta 5am i le vaveao ae uma loa ona lalafo tau i le atina'e, ua leai se pa vao i le va o Malua ma Utalii, uma foi na toto ma tiapula e lei opo le lafo, ona pepese foi lea o le au pulou'apa i le pese e fiafia tele i ai le susuga ia Lale, 'Leulumoega lo'u sei ou te tiu ai i Samoana, le aai ua pele tasi i lo'u agaga..... malie lou loto faapea le vaaiga o mata, Roma fou e o le puna o le malamalama.'

O upu masani lava ia o le pese lea e fiafia tele Lale, e faala'ei'au ai ma faamalosi'au ai i tama ma teine Roma fou pe a faasauni i ni taaloga poo ni galuega faitele a le kolisi. Na oo i le aso Toanai o le vaiaso na sosoo ai, ae ta mai i le nusipepa a le Samoa Times (headline) 'Ua toe oo le kolisi o Leupumoega Fou i taimi o pulega faaRoma, pulega faafitafita pulou'apa.' **Ia a'oa'oina i mea faigata e iloa ai e leai lava se mea e ta'ua o se mea faigata,** e le gata o tama ma teine a'oga, a o matou foi o faiaoga ma le aufaigaluega sa matou mafuta faatasi ai ma le susuga ia Lale. O le igoa eva lava e masani ma fiafia Lale e fa'aaoga e ta'u ai se tama poo se teine na aoga i Leulemoega Fou, o le Pulou'apa, e faamanatu ai pea mea faigata sa fofoa mai ai o latou olaga aoaoina i Roma Fou. Ae o le igoa eva o Lale e masani ma fiafia tama ma teine ma matou uma sa mafuta ia Lale i lea vaitaimi, o le igoa... 'Tamafaigata le Godfather', aua e finau tele ma taulamua i mea lelei mo le atina'eina o le kolisi a lana ekalesia i LFC, i le faamoemoe maua luga, e ola manuia soo se tama ma soo se teine pulou'apa sa utuvai i Roma Fou. O le Pulou'apa ia Lale, o se igoa taua lea e faamanatu ai pea lona talitonuga, faafilosofia faafaiaoga lea, **ia a'oa'oina oe i mea faigata i lou mafaufau, e te iloa ai, e leai lava se mea e ta'ua o se mea faigata.**

E manatua pea oe Lale i ou uiga faafiufiu ma le taufaalili i si toeaina o Oka Fauolo ao pule ai i le Kolisi i Malua. Na ma o i le ofisa o le palemia Tupuola Efi i se mataupu faavaomalo, ae tali mai le failautusi a le palemia, e le toe maua se avanoa o le palemia mo le 2 vaiaso ona ua amatalia le Fono a le palemene. Fai mai loa Lale ma te o ia Oka, ao Oka o la e ita ia Lale ona o tua'oi o fanua ma le tafana mai e Leulumoega o povi a Malua, ao lea fai mai ma te o i ai, ona e fia maua se fesoasoani mai ia Oka ma te o ai e vaai le palemia ona o Tupuola o le uo a Oka. Na ona tilotilo mai a o Oka ua afe atu le ma taavale faasagasaga loa i le sami ae u mai le tua, ma o atu loa i le fale matou talanoa ai lava ma Soo e leai lava ma se ano mai o Oka i a ma'ua, fai mai loa Soo ia Oka, o Lale ma Fuifui lea na omai i le la fe'au ia te oe. Na ona liliu mai lava o Oka fai mai, "O le a le mea e feoa'i solo ai fua oulua ma tafafaovale a e le o e fai ni fe'au aogā?" Ataata a lea o Lale ma faatau le ma fe'au ia Oka, e faasaga a Oka i le sami ma tali mai, "Ia ana le o se fe'au mo Fuifui, ou te le toe fesoasoani atu lava; a e o sei ou vili ia Tupuola toe ta'u atu ai se tali mai". Ma o mai loa i le ma taavale ma ataata Lale fai mai, uekeueke, ia ua oti foi le Uluvai ia ta'ua. Mulimuli ane ou faalogo atu, na i'u lava ina tau'ai e Oka i maa (1985) ona o le faafiufiu ma le taufaalili i si toeaina. (itula 12)

O LE PEROFETA MULIMULI

(O le tala faafagogo faaSamoaia mai le tusi 'The Last Oracle' tusia e James Rollins)

“O sailiiliga lata mai faaleitio mai le vaegaau tuufaatasi o faaniukilia, o loo manatu o le lolovai fa’aafaafa o le Vaituloto o Karakai i totonu o vaieli, e ui ina faaletonu ai le lotoifale ma manaomia ai le tuua o laufanua e faitau maila faasolo i lalo, ae peitai e lē afaina pe lamatia ai le soifua o le lalolagi aoao tetele. O faitotoa na puipuia ai vai sa tapunia i le taimi e fetauilelei.”

Na to’a mai le pupula a Karai. “A e faapefea tamaiti?”

O Paineta na ia asiasi i le falemai i le taeao lenei. O le isi itu atoa o le Falema’i o le Iunivesete o Siaosi Uosigitone, ua faavanoa atoa mo tamaiti na aumai felelei mai Rusia. O le vaega o fomai o le neura na alu vaiaso ua te’a o latou galulue faagesegese ma le faaeteete, e aveese taotoga faapipii sa i ai. E pei ona sa tau matemate le faauluuluga o le vaega lena, o le galuega e ma’aleale ae le faaeteete gatā. O le tamaititi mulimuli na aveese mai ona taotoga faapipii i nai aso talu ai. Sa manuia uma i latou.

“O su’esu’ega na iloa ai nisi taleni savana sa totoe i totonu o tamaiti e ui ina vaivai le laasaga na i ai,” na fai atu ai Paineta. “O le a lava le fesootaiga na faasoa i le faaiuga e foliga mai na ia susunuina ese le faavae o fausaga faaneura na aumaia a latou taleni matautia. A e i le isi itu, o le suiga e foliga mai foi sa faaititia ai o latou atamai faapitoa. Ua fa’aalia le solosolo lelei o tamaiti. Ui i lea, o ai lava o le a faia le galuega o le tausiga o nei tamaiti, o le a latou malilie e fai se tausiga e vaavaai ma leoleo faalelei o latou ola maloloina, faatasi ma le su’esu’eina masani o mafaufau, e le gata i a latou taleni ae faapea foi i le soifua maloloina faalemafaufau masani.”

O Paineta sa faatau pupula atu ia Luka, sa tumau lona to’a, a o ona mata sa pupula mai ma le faamoemoe. Na mulimuli ane ona ata lea o Paineta. “Peitai o le faaiuga autasi o le komiti, o le a faasaoloto atu tamaiti i aiga Kipisi mo le tausiga o i latou.”

Na patatū le tu’i a Luka i luga o le laulau. “Ioel!”

O lana tali atu leotele na faate’ia, ma tagi mai ai se tasi o solofanua ma le ta tū lapo’a i lalo o lona vae. Na alu le isi afa itula o su’esu’e e Paineta ma siaki isi faamatalaga manaomia sa fesoasoani e faanofo filemu le tamaloa a e misi atoa ai se faamaninoga i mata o le Kipisi. Mulimuli ane ona latou tula’i lea ma amata ona taape.

Na alu i fafo Elisapeta, ma Koualasaki i ona tulilima. “O lea la ua e toe sau i le taulaga,” na memumemu atu ai Koualasaki i le tamaitai, a o faasolo lona alofilima i lona ulupoo ua sele. “E te mana’o ta te... Atonu e mafai ona ta...?”

Na ata lemu Karai i le taumafaiga a le tamaloa, ma lue atu loa ulu ia Paineta ina ia sōsō ese i le itu. “E le manaia le mea lea o le a tula’i mai.”

“O le a le mea lena e te tau fai mai ai, Sio?” na fesili atu ai Elisapeta, ua si’i i luga lona laumata i ona masaloga i le tamaloa lapo’a.

Na tau memumemu le tamaloa o Koualasaki, ma upuvale i lana mānava, ona tu sa’o lea. “E te mana’o i se tafaoga faaevaga?”

Manaiia tele, sa mafaufau ai Paineta, a o oomi i totonu lana ata.

Na faamimigi tauau o Elisapeta ma ia ta’ita’i atu Koualasaki i fafo. “O le uiga o lau fesili, o se evaga faalua, o le sa’o lea?”

Na manumi le muaulu o Koualasaki pei se laupapa ta lavalava.

“Ou te manatu o le tafana e tagata, ave faamalosi, faatigaina, ma lavea’iina o le lalolagi, e mafai ona ta’ua o se *tafaoga evaga muamua*.”

Na savalivali atu pea Koualasaki i autafa o Elisapeta, o lona mafaufau foi o loo pipii atu pea i le tamaitai. “O lona uiga la, o le a e alu?”

Na lue le ulu o Elisapeta. “Pe afai e te sau ma aumai sikā.”

Na ataata lemu Koualasaki. “E i ai la’u pusa atoa o – *oi sole, pagā lea!*” Na ia tu ma tilotilo ifo i lalo i ona seevae.

O lona seevae agavale ua tu lelei i luga o otaota a le solofanua. “O o’u seevae fou nei!”

Na tago atu Elisapeta ua tuu mai lima o le tamaloa i lalo o ona ‘ao’ao ma o ese atu. “O le a toe te’a ese lava ma toe mamā.”

“A e te lē malamalama! O le pa’u lea e fai ai na polesi faapitoa lava e...”

Na mou atu le toalua lea ma lilo atu i le toatele.

Na lulu le ulu o Karai. “Ua maua le evaga a Koualasaki. Ou te manatu ua faasolo ina mālūlū tele seoli.”

Na aga’i atu Paineta ma Karai i le Maota Simifisonia. O i la’ua uma sa tofu ma faaputuga o galuega e fia fai. O le pule a Sikima o loo taoto pea i se tulaga faaletonu, e le gata o le faapolotiki a o lona

faatulagaina faafaavae. Ua leiloloa nisi o ona taitai iloga i le osofaiga muamua, ma o se tasi o vaega atoa o loo ua leiloa atoa lava ona o afāafi mumū. O galuega toe faafou ma asiasiga o loo faagasolo pea. A o le itu faapolotiki o loo mamao lava se tulaga lelei mai. Na latou mafai ona pu'ea le fomai neura o Fomai Iakopo Seni, o se tasi o Iasoni na fesootai ma Mapeletope ma Makepalai. I faiga faatalanoa faamalosi, na ia fesoasoani ai ina ia vele ese le au Iasoni pi'opi'o mai le au saienisi faamaoni na galulue mo le Matagaluega o le Puipuiga. Peitai o Mapeletope o se isi lena mataupu. Na i ai lava ona tamatama'ilima i vaega ma lālā o le vaegaau a Uosigitone. E le'i matua manino mai pe sa galue toatasi o se faomea pe sa i ai nisi sui o Uosigitone na latou lagolagoina gaioiga a le tamaloa. O le i'uga na oo i ai, na faataamilo solo taavale la'u uta a togalauapiga a le atamai, e puipuia i latou, a o tusitusi lima pea.

E oo lava faasino i le Sikima.

O le ala lea na faataamilomilo ai manulele feai, peitai sa ia Paineta le lagolago a le peresetene agalelei. E tele se galuega e fai, peitai o le a le pine ona latou faatulaga ia solo lelei mea uma. O le upu moni, o Paineta sa fuafua e feiloai ma le sui o Seana Makenaiti a taeao, o le faauluuluga fou mo le taimi nei o le TARAPA. Na muamua ofo mai e le peresetene le avanoa ia Paineta, peitai na ia teena. Na manaomia e Sikima se sosooga fa'aauau. E pei o le sootaga vavalalata o mafaufau o Atipale Poleki ma Seana Makenaiti, e faapena ona lē mafai e Paineta ona lafoa'i Sikima.

Na tepa atu Paineta ia Karai. "O la'u taofi o le a fa'aalu lou aso atoa i le falemai a taeao."

Na lue lona ulu. "E manaomia e Kati se paaga."

O le taotoga o Monike Kokalasi na fuafua mo le ono i le taeao. Na faailoa e faata maneta ma su'esu'ega o le tino, le mea na fai ia Monike i totonu o fale su'esu'e o Rusia, peitai sa le iloa pe mata e mafai ona toe faalelei mea ua faaleagaina. Ua uma ona faapipii ma faauaea e Rusia se maikorosipi i totonu o le fai'ai manatua o Monike. E talitonu fomai o le mafaufau ma neura, o le maikorosipi lea ua na tuuina ma faatumauina se *vailaau amnesia*. O se auala faametotia ua uma ona su'esu'e na fa'aaoga ai vailaau faapitoa e poloka ai ma aveese lagona ma manatuaga o manu'a. O le au Rusia sa fai a latou su'esu'ega ia Monike, na fa'aaoga ai metotia ma auala e tutusa ma pirotekonolosi.

Na tolopo le taotoga seia uma le faasologa o isi togafitiga faakasa oona o Monike. O fomai o le mafaufau na latou fa'aaoga le taimi faasili, e su'esu'e ai le mataupu ia Monike, peitai latou te le'i mafai ona ta'utino pe mafai e ia ona toe maua mai lona manatua o mea – aemaise ona o isi sailiiliga na maua mai i le MRI. Ina ia faapipii le maikorosipi, o se vaega itiiti o le maea alio ma le fai'ai o Monike na aveese.

Na manatua e Paineta foliga mata'utia o Monike ina ua ia malamalama i le mea lena, ma ana upu faanoanoa: *Muamua o lona lima, o lenei o se vaega o lona fai'ai...e peisea'i o Monike ua aveese malie atu.*

"Sa i ai se faailoga e iloa ai ua maitauina e Monike ia Kati?" na fesili ai Paineta.

Na lulu le ulu o Karai. "O fomai sa tele ina latou taofi ese Kati. Na latou talitonu, a o i ai pea le maikorosipi i lona ulu, o nisi faalavelave faaopoopo i lona mafatiaga o manatuaga, e pei o le sootaga ma Kati ma lagona e tutupu mai ai, o le a saga faateleina ai le manu'a nai lo le togafitiga."

"A e sa ia asiasi atu pea i ai."

Na lue lona ulu. "Sa tataua te ia. Na ia alu i le potu faatasi ma se vaega o tamaitai tausima'i. Na latou talanoa ma Monike, peitai sa le'i i ai ni ona foliga aafia i lona vaaia o Kati. Leai ma se mea. Ma sa matua'i faamanu'alia ma faaleagaina ai le tamaitai. Ua na maua mai Monike, peitai ua leiloa pea o ia ia te ia."

"Lona uiga o le a tatou tatalo malosi mo le mea sili."

29 Setema, 6.21 afiafi

Falema'i, Iunivesite o Siaosi Uasigitone

Na ala a'e le tamaloa i se potu ua malamalama tele. Na tiga ai ona mata ma taia loloto i tua o lona ulu. Na sosoo mai ai lona faafaufau, faatasi ai ma le niniva faasoloatoa. Na ia folofolo malosi mo sina taimi ma faamalosi e faasagatonu lana vaai.

O se fafine pa'e'e i toniga lanumoana na ia popo lona lima. "Malo lava, alii Kokalise. Tau lava ina e manava." Na ia liliu ese. "Ua faasolo ina tulaga lelei atoatoa mai i lenei taimi."

Na uma le taavilivili. O le patapatatū o tagipalau i lona ulu na faasolo lemu ifo i le na o se omiga lemu. Na ia iloa ua i ai o ia i se potu o le falema'i, na manatua na o nai mea laiti. O le taotoga. Na sii a'e lona lima ma iloa o loo faamau i se taofi uga o loo pipii ai ni faagaau o sinasina ifo ai vailaau saline ma

se iunite o toto. I le isi itu, o loo tagitagi ma emoemo mai ai faailoilo.

Na taumafai Monike e faagaioi lona ulu, peitai na tiga lona ua, ma sa i ai se faagaau na toso mai le pulou i lona ulu.

O se vaega o fomai na ulufale mai, faamumū mai moli i ona mata, ma ta'u mai nisi su'ega e fai, ia siaki lona gafatia e folo e ala i fasi aisa, ma isi su'ega o neura ma musele. Ina ua uma le sefulu minute, ona latou toe o ese lea, o talanoa i le tulaga o i ai lona ma'i, ua tuua ai le toalua sa tutū i tua o lona moega. Na maitau e Monike le tamaloa. "Karai..." na ia fai mai i le leo oolo, o lona fa'a'ā o loo afaina pea mai le faagaau.

Na pupula manino mata o le tamaloa.

Na silafia e Monike le mea sa latou faamoemoe uma i ai, le mea sa ia faamoemoe i ai, peitai na lūlū lona ulu. Na ia iloa le tamaloa mai le vevesi i Rusia. O se tamaitai iloga i lona ofuvae ma se ofutino lusi na faalagolago atu i ona autafa, o lona lauulu enaena e gata i ona tau'au. O ona mata lanu meamata na saili solo ia Monike mo ni tali. Peitai e le'i iloa e le tamaloa le fesili.

Na pa'i atu Karai i le tulilima o Kati. "O loo fai lava sina vave, Kati. O lena e te iloa. Na fai mai fomai e faitau masina faato'a tula'i mai se suiga lelei."

Na liliu malie le tamaitai i le itu ma soloi ona mata. "Ou te iloa," na ia fai ane ai, a e pei lava o se ōi.

I ona faalogona ua faama'ai e le taumulimuli atu o le faafaufau, na taia ai i le sogitia a Monike se manogi sasala i le 'ea, o se manogi e masani ai, e manaia ae pei e mamafa. E leai se manatua na aumai faatasi ai, peitai na faasolo faatopetope lana manavanava.

O se mea... o se mea e uiga i...

"Ua tatau ona tuu o ia se'i malolo," na fai atu ai Karai a o ia taitai ese le fafine. "Tatou te toe o mai i le taeao. Ua leva le aso. Ua tatau foi ona e alu oe i le fale."

Na geno atu Karai i se taavale pepe lanu moana sa i o la tua. O moe ai se tamaitiiti, na afifi i palanikeke, o lona ulu o pulou pei o Monike, o moeiini mata ma lona gutu o mapuni.

Na faataupupula Monike i le pepe. Na 'emo'emo faamotumotu mai vaaiga mai le leai o se mea.

...o tamatama'ilima laiti na faataamilo i lona tamatamailima...na savavali ifo i se potu pogisa, o lē lavavā, o faahuelue le tino itiiti i ona lima... o tama'i vae o fea'a a o ia sui lona napekini...

Na o ni momoimea. Leai se fesootaiga. Peitai e le pei o talu ai, sa leai se tiga, na o se malamalama faatoafilemu sa le'i mou ese i le taimi nei.

Mai lena susulu, na ia maua ai sina matāua o lona tagata.

"O ia..o lona igoa..." Na faliu atu le toalua i le pepe. "O Penelope."

Na faatau pupula le fafine i le tamaititi, toe vaai atu ia Monike. O le tino atoa o le fafine sa luluina, a o liua nai tulutulu e avea ma vaegamea o le olioli. "Monike..."

Na ia faavave atu i lona itu, faapa'ū atu i ona luga. Na ia punou ma sogi lemu atu ia te ia, o lona lauulu na fola ma ufitia uma ai.

Na ia manatua.

Le tofo o kinamoni, laugutu mālū..

Na te le'i iloa lava lona igoa, peitai o se faaosofiaga o le alofa na totogo a'e i totonu o ia, na afua ai ona maligi ona loimata. Atonu o le a ia le iloa lava lona igoa, peitai e tasi le mea ua mautinoa e Monike i lona fatu; afai e tuu atu e le fafine se avanoa mo ia, o le a ia taumafai e iloa tonu poo ai o ia, e toe amata lelei atoa mai i le amataga.

7.01 afiafi

Na alu ifo Karai i le faitotoa o le falemai, a o tuua ai Kati ma Monike i se mafutaga na o i laua. A o i ai o ia iinei, na ia mana'o e siaki se tasi ma'i. Na ia afe atu i le itu o i ai falema'i o tamaiti. Na fa'aaali atu lana pepa faamaonia i se fitafita fa'aauppegaina o tiute ai.

Na faataga atu o ia ona alu atu lea i le tele o potu laiti. O puipui sa vali faatasi ma paluni sa teuteu ai ma ata o manu. Na ia pasia se tama i ona ofu moe. Na laua savalivali ma se teineitiiti. O la'ua ulu sa sele poo le isi itu. Na talanoa topetope faaRusia.

O tamaiti uma e pei ua to'a mai nai le vevesi sa feagai ai talu ai.

O lena, vagana ai le isi tamaitiiti e *toatasi*.

Na ia kolosi atu le isi auala umi e tau atu i se potu tumaoti i le faasi'usi'uga. Sa matala le faitotoa. Na ia lagona atu leo i totonu.

Na tu'itu'i lemu atu Karai ma ulufale i totonu. O le potu sa i ai se moega itiiti ma se vaega e taalo ai sa i ai se tama'i laulau uga ma se seti nofoa o tamaiti na li'oli'o ai. Na ia maua ai Fomai Lisa Kumiga o tu ai ma tusitusi lana faila. E tusa ma ona agavaa faafomai, sa ia fesoasoani i le vaega o fomai o taotoga ma isi

fomai, a o ia lipoti foi ia Paineta i taualumaga pe a i ai ni faafitauli e tula'i mai.

Sa nofo ai Sasa i le laulau, o valivali lana api. Na ia ofu se poneti piniki e ufiufi ai lona ulu na sele.

"Alii Karai!" na valaau atu ai le teine ma oso mai lona nofoa pei se lapiti ma tamo'e atu. Na ia fusi atu i le vae o Karai.

A o Karai na ia popo atu i lona tauau.

Na sau soo Sasa iinei pei o Karai, e asi lona tuagane. O Piota sa nofo i se nofoa faataavale i autafa o le faamalama, o faataupupula i fafo i le malamalama. Na ia nofo e pei o se faatagata uga. Nofosa'o, malo, leai se tali mai.

"O i ai se suiga?" na fesili atu ai Karai ma lue atu i le faila o i lima o Lisa.

"O loo i ai nai suiga. O lea ua 'ai i le sipuni. O mea'ai a pepe. E pei ua toe faatamameamea. O loo faamoemoe alii fomai e sau taimi e tupu a'e ai o ia e tusa ma lona tino."

Na faamoemoe Karai e sa'o i latou. Na lavea'iina e le tama lenei le lalolagi, ma na faaositaulaga e ia mea uma ina ia taunuu ai.

"Kara, afai e mafai ona e tuua le tama i lona moega, o le a matou tuu atu oe e faatasi ma ia na o oulua mo sina taimi."

Na lue atu Karai.

"Sasa, sau loa, ta toe o i lou potu."

"Faatali!" Na ia faamamulu le vae o Karai a e momo'e atu ia Piota.

"Faatofa loa ia Piota, ae tatou o loa," na tulitatao atu ai Lisa.

Na sogi atu Sasa i le alafau o lona tuagane, ona toe tamo'e mai lea ia Karai ma sisii atu ona lima ia te ia.

Na punou ifo Karai e sogi faatofa foi, ma ofo atu lona alafau. Na sogi atu ai Sasa, ona tago lea ua falo lona taliga. Na ia toso mai ma musumusu atu i ai.

"O Piota e le o i ai i totonu i o," na ia fai atu ai i leo faatupu faalavelave. "O se *isi* tagata ese o loo i ai. A e o le a ou alofa pea ia te ia."

Na tau lagona e Karai se maalili teisi i upu a le teineitiiti. Atonu sa faalogo ai Sasa i tala a fomai.

Sa le manino ni faailoga o le a i'u lelei. Tusa lava pe toe malosi mai Piota i lona olaga, o le a le toe tutusa lona olaga faatama.

Na milimili e Karai le lima o le teine, na faamautinoa i ai, peitai na te le'i tuuina ia te ia se faamoemoega sesē. E sili lava le tuu pea ia te ia na te fetuutuunai ma iloa ai le mea moni i ana lava auala.

"Sasa," na lapatai atu ai Lisa.

"Faatali!" na toe fai atu ai le teineitiiti ma tamo'e i lana laulau. "E i ai sa'u meaalofo mo Kara." Na ia su'e solo i lana faaputuga pepa.

Na faatali Kara, o loo tootuli pea i le tasi o tulivae. Na ataata Lisa ma fai atu, "E le o fia moe lava o ia."

Na toe tamoe mai televave le teine ma se pepa na sasae ese mai lana api tusiata. Na tuu atu i lima o Kara. "Ia lea," na ia fai atu ai ma lona mimita.

Na faataupupula ifo Kara i le ata o se tagata faimea malie. Ua na valivaliina lelei, faaopoopo i ai ma ni suiga ina ia foliga faanoanoa toe faafefe tagata. O loo i ai pea ni atamai ma taleni ia te ia.

Na toe faalagolago atu Sasa i lona taliga. "O le a e oti."

Na faate'ia Kara i le tala a le teine, peitai sa leai se taufaafefe i lona leo, na o se ta'utino o le mea moni, e pei o loo talanoa i le tala o le tau. Sa faapea Kara o loo tauivi Sasa e fia malamalama i le mataupu o le oti. Ua na vaaia soo lea mea o le oti, ma o lona tuagane o loo tautau i le paleni o le ola po o le oti.

Sa le'i iloa tonu e Kara se upu a fai atu. A e pei o le muamua atu, na te le'i pepelo ia te ia. Na ia tu pea a o tuu lona lima i luga o le tauau o le teine. "Tatou te feoti uma lava, Sasa. O le faasologa faalenatura lena."

Na mapuea Sasa i foliga masani o tamaiti pe a feita. "E leai, lou vale." Na ia faasino atu i le pepa. "E tatou ona e faateete i le mea lena! O le ala lena na ou valia ai!"

Na faasino atu Lisa i le faitotoa. "Ua lava lena, Sasa. O le taimi lenei o le moe."

"Faatali!"

"E leai."

Ma le faanoanoa, na ia faataga ai Lisa na te tosoa ese o ia. Na ia talotalo atu ia Kara, i lona lima atoa. Ina ua o ese le toalua lea, ona laa atu lea o Kara ia Piota. Na ia manao e nofonofo ma le tama, ia ta'u i ai e le o faagaloina o ia, o lana osiga taulaga o le a manatua pea. Na ia sau foi iinei ona o Monike. E uiga ese foi le taua o le tama i lana uo. Na lagona e Kara se tiute maoti ina ia leoleo ma tausii ia Piota. Peitai o le upu moni, o asiasiga sa avea foi o se pasama i lona fatu. Na ia lagona se to'amalie uiga ese i le faatasia ma le tama, se lagona e lē mafaamatalaina, e peiseai o loo i ai pea se mana alofa o loo siosiomia ai le tama.

A o nofo ai nei Kara, na ia toe mafaufau i mea uma na tutupu. Na ia manatua lenei tama a o ia toso atu Monike ua iloa atu i lalo o le potu tele. Ua iloa nei e

(fa'aauau itulau 12)

MOLIMAU O LALE IEREMIA FT

(mai le itulau 7)

Talofa e, i le aufaigaluega a le Ekalesia i na aso, e leai se mea e faigata ia i latou, ona o le naunau i tama fanau a le Ekalesia ia i'u manuia. E tele tala o Alo, ae le maua lava le tele o tala o le uso a auuana ia Lale le Tamafaigata, ae ona ua utiuti le avanoa. Ae sau ia lau susuga i le faiaoga, susuga i le pulea'oga, vaeane lau susuga i le faife'au toaina penisione malolo, le sa avea ma Taitaifono o le Fono Tele, **REV ELDER LALE IEREMIA**, matou te faapea atu ai, Ua malieo ua malie malo. E fai ma sui o soo se Pulou'apa, tama ma teine mualua i soo se vaipanoa o le kelope e saga faafetaia ai pea le Atua, ona o le mafutaga mafanafana sa tatou mafuta faatasi ai ma lau susuga. Ia manuia lau malaga LALE le Tamafaigata.....tatou feiloa'i i se aso Godfather....e manatua pea oe, alofaaga e le mavae mai le laumua o le Ekalesia ma le Kolisi o Leulumoega Fou (1972-1983) e pele i o tatou loto ma agaga, soifua ma ia manuia.

(saunia e Fuifui Teevale, FS Penisione)

(Suipule Kolisi LFC 1977-1981)

FAAMAONI & LOTOMAU O

RUTA (mai le itulau 5)

Pe afai tatou te faitau pea i lenei tala, ma mulimuli seia oo i le i'uga, tatou te iloa ai le taunuuga manuia ma le fiafia, i le tauai ma faamanuiaga a le Atua, mo Ruta, i le faamaoni ma le tutumau o lona alofa. E ui ina maliu lana tane muamua o Maalona sa le'i maua sona suli i totonu o Moapi, ae na toe faaipoipo ia Poasa, ma na fanaua le atalii ia Opeti i totonu o Peteleema, ua faitaulia ai o ia i le gafa o le tupu o Tavita, ae tini taunuu ia Iesu le Tupu o tupu, lo tatou Alii Faaola.

O le faataoto a Iesu i le vine moni ma ona la, ua Ia a'oa'o mai ai i ona soo ma le au faatuatua uma, i le auala e malosai ai ma moni le alofa, ma le faamaoni, ma le tutumau; e maua ina ua pipii atu ia te Ia, le puna o le alofa. Lea foi ua Ia a'oa'o mai ai, ina ia tatou fealofani, alofa o le tasi i le isi, aemaise le ituaiga alofa e sili – o le tuuina atu lea e se tasi o lona ola, mo ana uo. Le ituaiga alofa, faamaoni ma tutumau e pei ona sa fai e Ruta.

Le au uso pele e, ona o Iesu Keriso ma le Ekalesia pele, ua toe fafagu faamanatu mai lenei tala mo i tatou, i lo outou soifua ma lo'u ola o aso taitasi. I o tatou tiute fai ma le va feagai ai ma isi tagata, o tatou sootaga ma aiga, o uo ma soo se tagata. Ina ia fai i ai le alofa faaRuta, le faamaoni i tautoga ma tutumau i folafolaga fai. O se faamanatu taua mo a tatou osiga feagaiga, o le va o le tasi ma le isi, ina ia tausisi i le alofa, le faamaoni ma tutumau ai seia oo i le oti. Ina ia 'aua le na o le sogi faafoliga, sogi faalata; ua maalili le alofa, ua le pipi'i mau i folafolaga ma tautoga sa fai. A ia onosa'i, faamalolosi, loto tetele, e alolofa, e faamaoni ma tutumau se'ia oo i le iuga.

Ae silisili ai ona taua lo tatou alofa i lo tatou Alii, ma le tele o tautoga sa tatou faia – ina ua Papatisoina, ina ua faaEkalesiaina, ua faaTiakono, ina ua avea ma A'oa'o ma Faifeau, o tautinoga faa tupulaga talavou, folafolaga faa Au Taumafai ma Au Leoleo, aemaise le Tautinoga FaaAposetolo, o folafola ai lo tatou faatuatuaga. O tatou pipi'i faamaoni pea i lo tatou Alii Faaola e toatasi o Iesu Keriso? Po ua maluelue lo tatou faatuatua, ona o suiga tetele o le soifuaga, ma faaosoosoga ua tosina i ai o tatou fatu, o loto ma agaga? Ua faasolo ina faavaivai le molimau ma le ola osi taulaga, ua fefe i mea fai?

Ia tatou loto tetele ma faamalolosi e pei o Ruta, e pipi'i pea ma faamaoni e tutumau i lo tatou Alii, auā e lē vale so tatou tauai o faatali mai. Aemaise le faataitaiga sili o le alofa faamaoni o Keriso, na ofoina mai ai lona soifua, e ala i lona maliu i le satauro, ae na toetu manumalo, ina ia faaolaina i tatou. Ia tumau ia te Ia le viiga e faavavau. Amene. **(F. Tolua)**

O LE PEROFETA MULIMULI...

Karai le mea sa fai e Piota. O lona tuafafine na ia lavea'iina le ola o Monike, ina ua ia se'iina a'e o ia mai le sami ma lo latou olaga, ma Piota na ia toe faafoiina o ia, e faatusa i le toe faafoi o se meafaigaluega sa nonō mai, toe tuu atu i le pusa faigaluega a le tuaoi.

O mea uma na sa tutupu... na iloa e Karai e lē o se laki, pe ona pau lava ua fetaututusa. Na ia pulato'a ia Piota ma na vaaia foi Sasa.

O mea uma sa fuafua faatulaga lelei.

Ma, a o pulato'a Karai, na ia manatua foi Nikolao Solokova ma lona faamoemoe: ia fa'aaoga sesē le atamai o tamaiti talenia, ina ia maua mai ai le isi perofeta ta'uta'ua o le lalolagi. Le isi Puta pe o se isi

Moameta po o se isi Keriso. Na talanoaina e Karai ma Monike le mataupu lena a o la'ua asiasi mai ia Piota iinei.

I le faaiuga, na luelue atu lana uo i le tama.

Atonu sa sili atu ona faamanuiaina le au Rusia nai lo lea sa latou manatu ai.

Pe o le a lava le itu, e pei o le toatele o tagata, sa totogi e Piota le tau atoa o le faaositaulaga ma le faasatauro. O lenei la o le a latou le iloa lava le mea moni. Ma atonu e sili atu foi lena.

Na mapuea Karai ma tulei ese nei mafauauga faanoanoa. I ona lima, na ia gaugau le pepa vali ata a Sasa ma autilo ifo i ai. E foliga mai, e ese mai le tele o isi mea, o Karai ua amata nei ona popole i tagata faimea malie tau faafefe. A o ia numinumi le pepa, na ia iloa sa tusi pe vali e le teineititi se ata i tua o le laupepa sa avanoa.

Na ia tatala le pepa, faataupupula i le ata sa vali faalelei i penivali lanu uliuli.



O le ata o se tarako Saina itiiti, matagofie lona tusiga. O se te'i malūlū o lona maitauina na taia ai Karai. Na tuu a'e lona lima i lona fa'a'i. I lalo o lona ofutino sa faamau ai lana asoa tautau o loo i ai le ata o le tarako lenei e lanu siliva, o se meaalofo mai se tamaitai fasioti tagata, e le gata o se polomisi mai ia te ia, a e faapea foi o se fetu'u faamalaia.

Na tepa atu Karai i le faitotoa o le auala. Pe na vaai Sasa i le ata lenei i se taimi? Na ia pulato'a ifo i le ata vali, ma lona iloa i lona loto e le'i vaaia muamua e le teine.

O se lapataiga – a e le mo tagata faimea malie. A o ia faatau pupula, na maitauina e Karai, o Sasa sa ia faasinoino a'e i *luga* i le lautusi i ona lima. Mai lona tulaga maulalo, sa le'i faasino le teine i le tagata faimea malie.

Sa ia tusitusi faasino i le isi *itulau i lalo*.

I le ata o le tarako.

I totonu o le potu filemu, na lagona ai e Karai se tulaga matautia o loo fofou mai. Na ia musumusu lemu le igoa e fesootai i lena tulaga lamatia ma matautia.

“Seikana.”

O LE UPU FAAI'U

O loo nofo le tama i autafa o le faamalama ma sioa atu i fafo i le lalolagi malamalama o i tua atu. E le'i saunia o ia mo lona alu atu i ai. O loo tele pea itu e tatau ona faamasani i ai i lenei aiga fou. E fetau leaga faia mo ia ma e faigata ai ia te ia ona mafauau.

E mafai ona ia vaaia lona ata i le ipu malamalama: lauulu uliuli, foitino itiiti, o se foliga masani. Peiai na te le'i lagonaina lava o sona tagata lea. O lena foi mea, o le a tino mai i se taimi. A o ia pulato'a atu, o loo ia vaaia laulaau o toulou ifo i fafo o le faamalama, o tafetafea i le matagi.

Ua leai nei se fefe, tusa lava pe tele isi laulaau e toulou. O le mea o loo taatia loloto i totonu o ia o loo faatumuina le avanoa i ataata ma foliga. E fausia mai manatuaga. O le mea e sau e sili atu ona masani nai lo lona ata i le ipu malamalama. Na te iloa o le foliga lea sa ia laeiina muamua.

Na te manatuaina pea le pogisa, o se sami uliuli o 'a'au ma molī. Na te manatua le la o loo mate ifo i le ogatotonugalemu, o loo titina ese ina ia mafai e isi ona felelei ma susulu. Peitai i lena taimi mulimuli, o le tama sa ia la'eiina lenei tino na ia taofia se mealilo mai ia te i latou uma. A o ia tuua lena sami uliuli i nofoaga o i tala atu, na ia toso ese se isi malamalama mai le ala lamatia, ma faapa'ū atu i totonu o lena sami pogisa gaogao.

Ina ia ia toe ola faafouina.

O fafo i le taimi nei, ua tele nisi laula'au o loo to'ulu ifo, ma o ataata o manatuaga ua faatumuina avanoa, ma fausia ai foliga moni o le tasi na ofuina le tino lenei i le taimi nei.



O lenei foliga tuai o le a i'u ina faagaloina, a e lē o le tama na tuuina atu lona ola, ina ia mafai ai e se meafou ona fanau mai. E masani i ana miti, na te vaaia ai lena tama o tamo'emo'e i laufanua, o a'ea'e i mauga, o talotalo mai - ona toe galoma ese lea.

Ua matuā fiasia lava i le taimi nei.

O le tama fou o loo nofo i le nofoa, o loo faataupupula atu i fafo i le faamalama.

O se taimi, o le a ia toe tamo'e ai foi.

O LE I'UGA (The End)

(Ua faai'uina ai iinei lenei tala faasolo.

Malo le faitau, ma maitau ni ona a'oa'oga.

O LAU AFIGA O LE SULU I O'U VAE

Faatuatua i le Alii a e lē o tagata

“²⁵O le fefe i tagata e tupu ai le mailei; a o lē faatuatua i le Alii e faamamaluina o ia.” Faata 29.

E i ai nisi taimi tatou te faia ai le mea sesē o le tuu o lo tatou talitonuga i tagata, a e sa tatau ona ave lo tatou faatuatuaga i le Alii. A e ona o le Alii e lē mafai ona Ia toilalo a o tagata e tele ina faiaina, o le ala lea tatou te i’u ane ai i faanoanoaga. O loo ta’ua i le Tusi Paia, o le tupu o Asa o le malo Iuta, sa ia te ia le loto e lelei atoatoa i le Atua. Peitai ina ua faasagatau ane se tasi o ona fili ia te ia (le malo Isaraelu), na ia fememea’i ai, ma na faia ai se faiga paaga ma se isi tupu (Peniata le tupu o Suria).

E le gata i lea, a e na ia fa’aaogaina foi auro ma ario o oloa ma mea paia mai le malumalu, e osia ai le la’ua feagaiga. Na faalogo le fili i le faiga paaga a Asa, ona latou solomuli lea. Na iloa e Asa se auala e sao ai. Na manatu ua manuia lana fuafuaga, peitai e leai. Na auina atu e le Atua lana auaina le perofeta o Hanani, ma na ia a’oa’i i le tupu o Asa. *“⁷Ua e faalagolago i le tupu o Suria, a ua e le faalagolago i le Alii lou Atua...” 2 Nofo 16.*

O le vaivaiga taatele lenei o i latou e manatu ua atamamai ma popoto e fai fuafuaga, ua faalagolago ai i lo latou malosi ma le potu. Na fai atu foi Hanani, *“⁹Auā o fofoga o le Alii e fetaufetulia’i i le lalolagi uma, na te fesoasoani ia te i latou uma o e ua sao o latou loto ia te ia. Ua e fai faavalea lenei mea; o lenei, e afua i ona po nei ona i ai o taua ia te oe.”* Na i’u ina ma’i o ia, sa le’i saili foi i le Atua, a e na saili i foma’i mo sona maloloina; peita’i na i’u ai lava ina oti o ia.

E toatele nisi o ta’ita’i ma tagata galulue e amata lelei ma amata sa’o, a e taunuu loa i le tumutumuga ina ua faamanuia i ai le Atua, ona galo loa lea ma ua le toe faamoemoe i le Atua, a e ua fai lona lava loto, ma fautuaga a isi. O se feau faamanatu mo i tatou, ina ia ‘aue le avea lou faalagolago e tatau ai i le Atua, ma tuu atu i tagata. Fai mai le Faisalamo, *“O le Atua, o lo tatou malu ia ma lo tatou malosi; e fai o ia ma fesoasoani silisili i puapuaga.” Sala 46:1.*

Aua le ola faatusatusa i isi

“⁴A ia taitasi ma faamasino i lana lava galuega, ona ia te ia lea o se mea e mitamita ai ia te ia lava, a e le o se tasi.” Kala 6.

Sa faapea foi ona a’oa’o ma faamalosia atu le Alii o Iesu i ona soo, e pei ona sa tusi apoapoa’i le aposetolo o Paulo ia Kalatia. Ina ua mae’a lona toetu manumalo, na fa’aali atu Iesu i ona soo, ma saga faamalosia’au ia i latou. Na Ia valaau patino ia Simona Peteru, ina ia leoleo, ia fafaga ma ia tasi i lana lafu mamoe, o le Ekalesia lea, e mana’omia ai le ola faaositaulaga ma le ola faasatauro.

Na tali Peteru ma faasino atu ia Ioane, pe faapefea o ia? *“Ua iloa atu o ia e Peteru, ona fai mai lea o ia ia Iesu, “Le Alii e, pe faapefea o ia nei? Ua fetalai atu Iesu ia te ia, “Afai ou te loto ina ia tumau pea o ia seia ou sau, pe se a lea mea ia te oe? Ia e mulimuli mai oe ia te a’u!”* I nisi upu, faasaga oe Peteru e fai lau feau ua tuu atu, ‘aue le vaavaai vale, fesilisili fua ma faatusatusa fua ia Ioane.

E mafai ona a’oa’oina oe mai isi tagata, peitai faato’a e maua le fiafia atoatoa ma le faamalieina lelei, ina ua e ola ma galue e tusa ona faia ai oe ma valaauina ai oe e le Atua. Tamo’e i lau lava tuuga ma lau lava laina. E leai se mea lelei e maua ina ua e tausia faatusatusa. O le a alu uma ai lou taimi, lou malosi ma lou mafau, i le faamasinosinoina o le isi tagata ma le faatinoga o lana galuega. Pe afai foi e te maitau atu e lelei le galue a le isi nai lo oe, ona tupu a’e ai lea o nisi lagona leaga i lou loto, ona o lou silasila faatusatusa i le isi tagata.

E le gata i lea, e le tauia oe e le Atua e tusa ma taleni a isi tagata, a e tusa ma lou faamaoni i le tausia o taleni na avatu ia te oe. Pe tasi pe lua, a ua foai atu e le Atua e tusa ma Lona silafia o lou agavaa, ina ia talafeagai ma lou malosi, ae ‘aue ne’i faatigaina oe. E le faamasinoina oe i le natura o meaalofo na tuuina atu ia te oe, ae fua i lou fa’aaogaina ma le galueaiina o ia meaalofo na avatu ia te oe e le Atua. Pe le o se tasi lea mafuaaga na le mu ai le taulaga a Kaino? O le mea lea, ‘aue e te ola faatusatusa i isi. Ma ‘aue foi e te aia fua oe, i feau ma tiute a le isi uso.

(F. Tolua)

O E UA FAI I LAGI LE FOLAUGA

TAGISIA ALAO SOLOFUTI **MOMO'E GAGA'EOLO**

O le faletua o le susuga faafeagaiga taulagi o le EFKS Si'unui, susuga Momo'e Gaga'eolo FS. Na fanau mai Tagisia Alao Solofuti Gaga'eolo i le Aso Sa, 13 Me 1984 i lona nuu o Satoalepai. Na a'oga i le Tulaga Lua a Tutaga ma le A'oga Faifeau i Satoalepai. Na fa'auau ana a'oga i le Kolisi o Leifiifi ma fa'asolo atu ai i Niu Sila ma Ausetalia, ina ua vaetama e le susuga i le Toeaina ia Elama Alao FT ma Taeario (EFKS Newcastle, Pulega Sini Matu, Matagaluega Niusauelese, Ausetalia). O ona matua na tupu mai ai o Solofuti Faamoetaulao Su'ega Alo o Satoalepai, Sataua Fagae ma Fagamalo, ma lona tina o Paea Sufia o Manase ma Sapapalii.

Na faaipoipo atu i le A'oa'o Malua o Momo'e Gagaeolo Avealalo, i le aso 30 Ianuari 2010. Na ma'ua ulufale ai loa i Malua i le tausaga lava lea e faai'uina ai aso i le Kolisi Faafaifeau i Malua. O le aso 25 Setema 2015 na osia ai le matou feagaiga ma le Aulotu EFKS Siuniu i Falealili, lea ua i'u ai lona soifua, ua sefulu ma le tasi tausaga o ia tautua ai.

O le vaveao o le Aso Lulu, 7 Ianuari 2026 na alu filemu ai lana malaga, ina ua 41 tausaga, 7 masina ma aso e 26 le matua o lona soifua. Na fagua ai le Ekalesia i le tala faanoanoa i lona taeao segisege. Ua leva ona ia tauave gasegase o le tino. Sa siima'i foi i atunuu e mamao. Peitai ua i'u lava lona soifua i lana ekalesia. Sa naunau i le galuega ma lona valaauina. Sa ia fai mea sili mo le Atua. O se tina tatolo, na fua mai i lona olaga fua o le Agaga.

O ona toe sauniga sa faia lava i le malumalu o lana ekalesia sa auaua ai i le Atua ma le fiafia. Sa ta'ita'i i le sauniga e le Tamā o le Pulega Falealili, susuga Tunumoso Iosia FT (EFKS Sapo'e). O le Tusi Paia na faitauina e Panapa Panapa FS (Salesatele), o talosaga na fofogaina e le susuga Toalua Perese FS (Sapunaoa) ma le lauga na saunia e Risatisone Taua FS (Saleilua).

E matagofie molimau o lona soifua. Na faai'u ona sauniga i lona aiga i Nu'u fou ma lagomau ai. Faafetai i le aufaigaluega tofofi, o uo ma e masani, o aiga na lua aemaise o si a ma Aulotu EFKS Siuniu Falealili. Faapea foi tama fanau malaga mamao mai e fia molimau i le aso fiafia o Tagisia. Faafetai tele.

Na matou faatofa atu ia te ia i le pese a le au kerisiano, Talofa uso e, tofaina oe, Ua sau le itupo e malolo... Ona faai'u lea i le taumafataga ma fa'aaloaloga masani, ma taape fiafia ai. Manuia lau malaga Tagisia Alao Solofuti Gaga'eolo. Faafetai mo galuega lelei uma sa e faia mo le Atua. Ou te alofa tele ia te oe la'u pele. *“Amuia lea auaua, pe a sau lona Alii, e maua o ia o loo faapea ona fai.”* *“Le auaua lelei e, ma le faamaoni..ulufale mai ia i le fiafia o lou Alii.”*

Saunia susuga Momo'e Gaga'eolo FS

EFKS Si'unui, Falealili

Matagaluega FALEALILI SAFATA SIUMU.

SAUAO POTOA'E ROPATI

SOIFUA MAI: Aso Toonai, 21 Mati 1964.

MALIU: Aso Lulu, 11 Fepuari 2026.

E 61 tausaga, 10 masina, ma aso e 22 lona soifua.

O le aso o le toe sauniga – Aso Lulu, 18 Fepuari 2026.

“Auā o lo'u ola ua ia Keriso lea; a o lo'u oti, o lo'u manuia lea.”

O le Afioaga ia Sauao Potoa'e Ropati sa avea ma faletua o le tiakono o le Ekalesia. O se tasi fo'i o tina matua o le mafutaga tina o le EFKS i Vailele. Ua lologo faa-Tutuila le faafofoga a le aofia i le molimau a le toatele I GALUEGA LELEI na faia e lenei tina. E TAUTALA GALUEGA, o ana galuega mae'ae'a mo so'o se tagata, lea lava na faailoa tino e ala i molimau. E tusa ai ma faamaumauga o le api o le galuega, o le Aso 4 Fepuari 2016 sa faae'eina ai le “TOFI TIAKONO” a Falepauga Ropati ma le faletua ia Sauao – O lona uiga o le 10 tausaga o le la tofi a o lea ua maliu Sauao. O Falepauga o se tasi o sui o le KOMITI GALUE a le ekalesia ona o meaalofo ma taleni o agava'a i mea tau-uila poo le eletise o loo ia te ia. O Falepauga ma Sauao e ese foi le toaaga ma fiafia e auai i Sauniga Lotu. E fesoasoani malosi foi i le atina'eina o le Ekalesia. O le taleni a Sauao o le teuteuina o le falesa ma e ese foi le matagofie o foliga o le malumalu o le Atua pe a tofi lenei tinā mo lea feau.

Sa faaulufale lona sã i ona toe sauniga e Michael Alai (AM). O Talosaga sa feagai ma Maauga Motu (FS)), a o le Tusi Paia ma le lauga sa feagai ma Faoasau Aunese Suisala(TKT/AF). (itulau 16...)

ATA O E UA MALILIU & ISI MATAUPU

SAUAO POTOA'E ROPATI



TAGISIA MOMO'E GAGAEOLO



O le molimau a le Ekalesia, sa ou saunia. Sa faai'uina ona toe sauniga i lona oliolisaga tumau i lona maota i Vailele, ma sa lagiina ai le pese faatofa a le Au Kerisiano: "Talofa Uso e, Tofaina oe." Tofaina oe Sauao. Alu atu ia i lou Alii ma le fiafia. O Lē sa e auauna ai ma le fiafia, a o tatou mafuta ai i lenei ola. Manuia tele lau malaga.

Saunia susuga Siaosi Salesulu (FS)

EFKS Vailele.

Matagaluega VAIMAUGA

SUSUGA LALE IEREMIA FT



**(Kereta Fuafiva FT, Leuelu Setu FS,
Dr. Taipisia Leilua FS, @ EFKS Saanapu-tai)**

26/4/1941 - 19/1/2026